

29/10/2002

Rumah kos rendah untuk ibu tunggal

KUALA LUMPUR, Isnin - Kementerian Pembangunan Wanita dan Keluarga akan memberi keutamaan kepada ibu tunggal yang berpendapatan kurang RM600 sebulan untuk memiliki rumah awam kos rendah.

Menterinya, Datuk Seri Shahrizat Abdul Jalil, berkata Kabinet pada minggu lalu mengarahkan kementerianya menyediakan memorandum mengenai cadangan kaedah yang akan digunakan untuk mengagihkan rumah untuk golongan itu.

Katanya, beliau akan bekerjasama dengan Kementerian Perumahan dan Kerajaan Tempatan, Dewan Bandaraya Kuala Lumpur (DBKL) dan agensi berkaitan untuk menyediakan kaedah dalam memorandum itu.

"Perdana Menteri, Datuk Seri Dr Mahathir Mohamad dalam pembentangan bajet baru-baru ini menyatakan ibu tunggal yang berpendapatan kurang RM600 akan diberi keutamaan memiliki rumah awam sama ada untuk dibeli atau disewa.

"Kementerian saya dipertanggungjawabkan untuk mengesyorkan kaedah sesuai dan saya yakin kita dapat menyerahkan memorandum itu kepada Kabinet dalam masa sebulan," katanya pada sidang akhbar di sini, hari ini.

Terdahulu, beliau menyampaikan sumbangan wang tunai dan hamper bernilai RM160 kepada 300 ibu tunggal dan warga tua kawasan Lembah Pantai sempena sambutan Deepavali di Dewan Orang Ramai Rumah Panjang D, Pantai Dalam.